

# Aningaasanut inatsisip aaqqissugaanera aamma allaffissornikkut aningaasanut inatsisip suliarineqarnerata ingerlasarnera pillugit Namminersorlutik Oqartussat nalunaarutaat

Kommunit Namminersorlutillu Oqartussat missingersuutaat naatsorsuutaallu pillugit Inatsisartut Inatsisaanni nr. 26, 28. november 2016-imeersumi § 13, imm. 1, § 19 aamma § 36 naapertorlugit aalajangersarneqarput:

## Kapitali 1

*Maleruagassat atuuffissaat il. il.*

§ 1. Nalunaarummi matumani aningaasanut inatsisip aningaasaliissutit suussusaannut agguarneqarnera pillugu maleruagassat aamma aningaasanut inatsisissatut siunnersuummik suliaqarneq pillugu maleruagassat, aalajangersarneqarput.

*Imm. 2.* Nalunaarut Naalakkersuisoqarfinnut aamma qitiusumi allaffeqarfimmi immikkoortortanut, missingersuutaat aningaasanut inatsimmi ilanngunneqartunut, atuuppoq.

## Kapitali 2

*Aningaasanut inatsisip aaqqissugaanera aamma aningaasaliissutit suussusaat*

*Aningaasanut inatsisip aaqqissugaanera*

§ 2. Aningaasanut inatsimmiipput inatsisip oqaasertai.

*Imm. 2.* Inatsisip oqaasertaat aningaasaliissutitut takussutissiamut, ukiumi aningaasaliiffiusumi kontoni pingaarnerni allassimasuni aningaasaliissutit allassimaffiannut, tunngassuteqarput. Aningaasaliissutitut takussutissiami aningaasaliissutit ataasiakkaanut atatillugu ukiup aningaasaliiffiusup kingorna ukiut 3-t tulluuttuni aningaasaliissutit ineriartornerannut naatsorsuutigisat paasissutissiisutigineqassapput.

*Imm. 3.* Inatsisip oqaasertai aamma ukiumi aningaasaliiffiusumi oqaasertaliussanut tunngassuteqarput.

§ 3. Aningaasanut inatsit inatsisip oqaasertaannut nassuiaatinik imaqarpoq. Nassuiaatit ilitersuissutitut iluseqarput.

*Imm. 2.* Nassuiaatit minnerpaamik makkununga tunngassuteqarput:

1) Suliassaqarfiit akimorlugit angusanut takussutissiaq: Suliassaqarfiit akimorlugit angusanut

takussutissiami missingersuutini angusat ataatsimut katillugit allassimapput, siunertaq aamma aningaasaliissutit suussusaat malillugu agguarsimallutik.

2) Oqaasertaliussanut nassuiaatit: Oqaasertaliussanut nassuiaatit oqaasertaliussamik ilanngussinissamut tunngavissanik imaqrpoq.

3) Missingersuutitut takussutissiaq: Inatsisartut Siulittaasoqarfianut aamma Naalakkersuisut naalakkersuisoqarfiini suliaasaqarfiit ataasiakkaanut agguarlugit aningaasaliissutit suussusaat malillugit missingersuutit angusanut tamarmiusunut takussutissiaq.

4) Kontut pingaarnernut takussutissiaq: Kontut pingaarnernut takussutissiami aningaasaliissutit ataasiakkaanut atatillugu ukioq kingullermi naatsorsuutini angusat, aningaasanut inatsimmi aningaasaliissutit kingulliit, kiisalu ukiup aningaasaliiffusup kingorna ukiut 3-t tulluuttuni aningaasaliissutit ineriartornissaannut naatsorsuutigisat, paasissutissiissutigineqassapput.

5) Missingersuutitut ilanngussat: Missingersuutitut ilanngussat kontu pingaarnerni ataasiakkaani aningaasaliissutitut tunngavigisanik erseqqinnerusunik imaqrput. Sanaartornermut suliaasaqarfimmi, kontu pingaarnermi suliaasanik arlalinnik ilanngussivigineqarsinnaasumi, suliaasat ataasiakkaat ataanni suliaasamut nassuiaammi aningaasaliissutitut tunngavigisat allassimapput.

#### *Aningaasaliissutit suussusaat*

§ 4. Aningaasanut inatsit kapitali matumani §§ 5-9-mi allassimasutut aningaasaliissutit suussutsit immikkoortut 5-inut agguarneqrpoq. Aningaasaliissutit suussusaannik toqqaanermut suliaasap suussusaa apeqqutaavoq.

*Imm. 2.* Aningaasanut inatsimmi kontut pingaarnernut tamanut immikkut aningaasaliissutit suussusaat allanneqassavoq.

*Imm. 3.* Siunertaasoq aningaasaliissuteqarnermi immikkut soqutigisaasutut isigineqarpat, kontu pingaarneq pilersinneqassavoq.

*Imm. 4.* Aningaasaliissutit suussusaat atugassiinernut aningaasaliissutit atorlugit atugassiissutigineqarsinnaasunut aalajangiisuvoq, taamaattoq inatsisini, nalunaarutini imaluunniit oqaasertaliussani atugassiisinnaanermik annertusititsisunik imaluunniit annikillitsitsisunik maleruagassaqaarsinnaalluni.

§ 5. Ingerlatsinermut aningaasaliissutit sullissivinnut imaluunniit allaffissornikkut immikkoortortanut aningaasaliissutini pineqartunut, ukioq aningaasaliiffusumi ilanngaaseereerluni aningaasartuutitik akiliinissamut, aningaasaliissutitut killissaliussaapput.

*Imm. 2.* Aningaasaliissutini Naalakkersuisunut ilaasortaq akisussaasuusoq, missingersuutini tunngavigisat naapertorlugit ingerlatsinermut aningaasartuutitik akiliinissamut aamma ingerlatsinermut isertitaqarnissamut, piginnaatinneqrpoq.

*Imm. 3.* Aningasarsianut aningaasartuutit ingerlatsinermut aningaasaliissutit ataanni taamaallaat akilerneqarsinnaapput.

*Imm. 4.* Ingerlatsinermut aningaasaliissutini, sullissivimmut imaluunniit sullissivinnut imaluunniit allaffissornikkut immikkoortortanut ingerlatsinermut aningaasaliissuteqarnermi pineqartunut atasumik aserfallatsaaliuineranut aamma iluarsaassinernut annikinnerusunut aningaasartuutit, akilerneqarsinnaapput.

**§ 6.** Tigusisussat aalajangersimasut tunniussassanik aalajangersimasunik pisinnaatitaaffeqalersimasut Inatsisartut inatsisaanni aalajangersarneqarsimatillugu, aamma tunniussassat annertussusaat imaluunniit naatsorsuinermit tunngavissat inatsimmi immikkoortumi aalajangersarneqarsimatillugit, aningaasaliissutit inatsisitigut pisussaaffigisat atorneqassapput.

*Imm. 2.* Aningaasaliissutini Naalakkersuisunut ilaasortaq aningaasartuutini Inatsisartut inatsisaannik aalajangersagaasut akilernissaannut piginnaatinneqarpoq.

*Imm. 3.* Aningaasanut inatsimmi aningaasaliissutini inatsisitigut pisussaaffigisani aningaasartuutissat missiliugaapput, taamaattumik ilassutitut aningaasaliissuteqartoqartinnagu aningaasartuutaaneruset akilerneqarsinnaallutik imaluunniit aningaasartuutikinnerusoqarsinnaalluni. Aningaasaliissutinit nikingassutaasut naatsorsuutini ilanngunneqassapput.

*Imm. 4.* Aningaasartuuteqarneruneq imaluunniit aningaasartuutikinneruneq, aningaasaliissutitut inatsimmi tunngaviusut allanngorsimanerannik pissuteqartoq, ilassutitut aningaasaliissutitut inatsimmi ilanngunneqassavoq, kiisalu aningaasanut inatsit tullermit takkuttussami ilanngunneqassalluni.

**§ 7.** Tapiissutitut aningaasaliissutit, Naalakkersuisunut ilaasortaq inatsimmi pisussaaffiunngitsunut aningaasartuutini akiliinissamut piginnaatinneqarsimappat, atorneqassapput.

*Imm. 2.* Aningaasaliissutini Naalakkersuisunut ilaasortaq pineqartoq, aningaasaliissutit siunertaasa iluanni imaluunniit suliffeqarfinni aningaasaatitut akiliutitut aningaasartuutitut, ernianut aningaasartuutitut, inuussutissarsiortunut tapersiissutitut, sillimmatitut, isumakkeerinerit, taarsigassarsititsinernut assigisaannulluunniit tapiissutitut ilusilinnik aningaasartuutini akiliisinnaavoq.

**§ 8.** Isertitanut aningaasaliissutit, inatsisitigut pisussaaffigineqartunik taamatullu inatsisitigut pisussaaffigineqanngitsunik isertitaqarnernut, atorneqarsinnaapput. Naalagaaffiup Namminersorlutik Oqartussanut tapiissutai aamma akileraarutitigut akitsuutitigullu isertitat, pissarsianit isertitat, pigisanik nalilinnik tunisinerit, sanaartukkat il.il. isertitatut aningaasaliissutitut allanneqassapput. Isertitanut aningaasaliissutit kisimik aningaasanut inatsimmi isertitanut missingersuutini allassimasinnaapput.

**§ 9.** Sanaartornermut aningaasaliissutit, sanaartugassanik pilersaarusiornermut, pigisanik aalaakkaasunik sanaartornermut aningaasaliinermullu, sanaartukkanut, IT atorlugu periaatsinut allanullu pigisanut nalilinnut aningaasaliissuteqarnerni kiisalu Namminersorlutik Oqartussat taarsigassarsititsinissamut neriorsuuteqarpata imaluunniit kommuninut allanullu sanaartornermut iluarsaassinermullu suliaasanut tapiissuteqarpat, atorneqassapput.

*Imm. 2.* Sanaartornermut aningaasaliissutini Naalakkersuisunut ilaasortaq pineqartoq, sanaartornermut suliaasat imm. 1-imi aalajangersarneqartut, aningaasaliissutini suliaasamut nassuiaammi aalajangersarneqartutut, ingerlanneqarnissaannut aningaasartuutit akilernissaannut, piginnaatinneqarpoq.

*Imm. 3.* Sanaartornermut aningaasaliissutit marlunnut avillugit sanaartornermut aningaasaliissutigineqarsinnaapput, tamatuma kingorna Naalakkersuisunut ilaasortaq pineqartoq:  
1) Suliaasamut neqeroortitsinerup imaluunniit suliariumannittussarsiuussinerup ingerlanneqareernissaata tungaanut sanaartugassamut pilersaarusiornermik il. il. suliaqarnermut aningaasartuutini akiliisinnaalluni. Suliaasat aningaasaliissutini siunertat allassimasut iluanniissavoq.

2) Aningaasaqarnermut Akileraartarnermullu Ataatsimiititaliap akuersissuteqarneratigut, suliariumannittussarsiuussineq ingerlanneqareerpat suliassat ataasiakkaani ukioq aningaasaliiffiusumi aamma ukiut missingersuusiortusuni aningaasaliissutitut killissaliussanik atugassiissutigineqartunik atugassiiinnaalluni. Suliassat aalajangersimasut Aningaasaqarnermut Akileraartarnermullu Ataatsimiititaliaq piginnaatitsissuteqartinnagu aallartinneqarsinnaasut, inatsimmi maleruagassanik aalajangersaasoqarsimasinnaavoq.

### **Kapitali 3**

#### *Kontonut pingaarnernut pilersaarut*

**§ 10.** Aningaasanut inatsisip § 3, imm. 2, nr. 4, naapertorlugu kontut pingaarnernut agguarneqarnera, Aningaasaqarnermut Naalakkersuisoqarfimmit aalajangersarneqassavoq. Pilersaarummut allannguutit killilersimaarniarneqassapput, tassami ukiut arlalinnut Inatsisartut aningaasaqarnikkut pingaarnersiuneranni ineriartorneq malinneqarsinnaasussaammat.

### **Kapitali 4**

#### *Aningaasanut inatsisip suliarineqarnerata ingerlanera*

**§ 11.** Aningaasaqarnermut Naalakkersuisoqarfiup Namminersorlutik Oqartussat aningaasanut inatsisissatut siunnersuummik suliaqarnerat ataqtigiissassavaa.

*Imm. 2.* Aningaasaqarnermut Naalakkersuisoqarfik ukiut tamaasa kingusinnerpaamik martsip qaammataata naanerani, ukioq aggersumut aningaasanut inatsisissatut siunnersuutip suliarineqarnissaanut Naalakkersuisoqarfinnut tamanut pilersaarummik, nassiuussissavoq, taamaattoq takuuk imm. 3.

*Imm. 3.* Qinersinissap nalunaarutigineqarnerata imaluunniit pissutsit pingaaruteqartut allat tamanna pisariaqalersippagu, imm. 2-mi piffissamut killissaliussaq saneqqunneqarsinnaavoq. Aningaasanut inatsisissatut siunnersuutip suliarineqarnera tamatuma kingorna pissutsit pissusissamisoornerat eqqarsaatigalugu sapinngisamik ingerlanneqassavoq.

**§ 12.** Aningaasaqarnermut Naalakkersuisup aningaasanut inatsisissatut siunnersuutip suliarineqarnera pillugu Naalakkersuisut isummernissaannut tunngavissiaq ataaseq arlallilluunniit suliarineqarnissaat isumagissavaa.

*Imm. 2.* Isummernissamut tunngavissiaq ilaatigut qulequttanik makkuninnga inassuteqaatinik immikkoortunik ilaqartunik imaqqassavoq:

- 1) Missingersuutini piumasaqaatinut killissaliussat agguarsimanerat.
- 2) Iluarsaaqqinnernik inatsisinillu suliniuteqarnerit aningaasanut inatsimmut sunniuteqartut pingaarnersiorneqarnerat.
- 3) Sipaaruteqarnissaq.
- 4) Tunngavissat aarlerinaataasullu isummernissamut tunngavissiaq suliarineqarnerata nalaani ilisimaneqartut tunngavigalugit nunap karsiata isertitassaannut naatsorsuutigineqartut.

§ 13. Naalakkersuisoqarfinni suliaasaqarfiit ataasiakkaat, Naalakkersuisunit killissaliussat nalunaarutigineqartunut naapertuuttumik suliaasaqarfimminut aningaasanut inatsisissatut siunnersuummut missingersuutitut ilanngussat oqaasertaliussallu, suliarissavaat.

§ 14. Aningaasaqarnermut Naalakkersuisoqarfiup missingersuutitut ilanngussat aamma oqaasertaliussat misissussavai aamma teknikikkut allanngortitsinerit pisariaqartut suliarissallugit, takuuk kapitali 5, taamaalillutik ilanngussat aningaasanut inatsisissatut siunnersuut ataatsimoortumi ilaasinnaalissallutik.

## Kapitali 5

### *Missingersuutitut ilanngussanik suliaqarneq*

§ 15. Missingersuutitut ilanngussat suliarineqarneranni makkua isiginiarneqassapput:

- 1) Missingersuutitut ilanngussaq immersugassat aamma malittarisassat Aningaasaqarnermut Naalakkersuisoqarfimmit nassiunneqartut malillugit suliarineqassavoq. Immersugassat Namminersorlutik Oqartussat aningaasaqarnermut periaasiat aqutugalugu pissarsiarineqarsinnaanngortinneqassapput.
- 2) Missingersuutitut ilanngussat aningaasaliissutit suussusaat, maleruagassat tunngavigineqartut aamma missingersuusiornermut tunngavigisat pillugit paasissutissanik imaqassapput.
- 3) Kontu pingaarnermut oqaasertaliussaqqarpas, missingersuutitut ilanngussani allassimassavoq.
- 4) Ilangussat Naalakkersuisunut siunnersuutitut ilusilersugaassapput.
- 5) Aningaasanut inatsit siusinnerusumiittumut sanilliullugu aningaasaliissutitut tunngavigisat imaluunniit aningaasaliissutit annertussusaat annertuumik allannguuteqarsimappata, allannguutitut taakkununga pissutaasut missingersuutitut ilanngussami nassuiarneqassapput. Aningaasaliissutit allannguutaat kontu pingaarnertit allani malittaasunik aningaasartuutitut allatigut sunniuteqarsimappat, tamanna paasissutissiissutigineqassavoq.
- 6) Missingersuutitut ilanngussaq, paasissutissanik suliaasaqarfimmi ineriartornermik erseqqinnerusumik erseqqissaasunik aamma aningaasaliissutitut tunngavigineqartunik, imaqassavoq.
- 7) Missingersuutitut ilanngussaq suliaasami kisitsisit qitiusunik sapinngisamik imaqartariaqarpoq. Suliaasami kisitsisit sapinngisamik immersugassat assigiissaakkat malillugit suliarineqassapput.
- 8) Missingersuutitut ilanngussaq aningaasaliissuteqarsinnaanermik oqariartuutitalimmik, assersuutugalugu annertunerusunik aningaasaliissuteqarnissaq kingusinnerusukkut qinnutigineqarsinnaasoq siunnerfeqartumik, imaqassanngilaq.
- 9) Ingerlatsinermut aningaasaliissutit missingersuutaasunut ilanngussaq missingersuutitut nassuiaammik imaqassavoq, aningaasarsiat aningaasartuutitut, aningaasartuutit allanut immaqalu isertitanut agguarneqarnera allassimassalluni. Piffissaq aningaasanut inatsiseqarfiusumi aningaasarsianut aningaasartuutit piviusunngortinneqarpata imaluunniit aningaasarsianut aningaasartuutit akilerneqarnissaat naatsorsuutigineqarpat, pisortanut sulisunullu allanut agguarlugu sulisorisanut atuinnermut piviusunngortinneqartumut imaluunniit naatsorsuutigineqartumut takussutissiaq ilaatinneqassavoq. Ukioq aningaasaliiffiusumi sulisorisanut atuineq ukioq tamaat atorfinnut naatsorsorlugu allassimassavoq aamma marluk angullugit decimaleqartillugu imaluunniit kisitsisi qaninnermut iluitsunngorlugu, allanneqarsinnaalluni. Ukioq tamaat atorfik nalunaaquttap akunneri 2080-  
ini ukiumut suliffiusoq ilimagineqarpoq, nalunaaquttap akunneri 200-ni sulinngiffeqarneq ilanngullugu. Pisortanut atorfiit akissaateqarfik 36-mi qaffasinnerusumilu atorfittut kiisalu sulisartunut

isumaqatigiissutini atorfitut tamatumunnga sanilliunneqarsinnaasutut, isigineqarput.

10) Inatsisartut inatsisaat sorleq naapertorlugu aningaasartuutit akilernerqassanersut, kiisalu aningaasaliissutitut naatsorsuinnermut tunngaviusut aamma missingersuutitut tunngavigisat, inatsisitigut pisussaaffigisanut aningaasaliissutitut missingersuutitut ilanngussami allassimassapput. Tamatuma saniatigut tiguisussat, tunniussassanut akigititaq aamma suliaqarnissaq naatsorsuutigineqartoq, ilanngullugit tiguisussat amerlassusaat, erseqqissumik allassimassapput.

11) Sanaartornermut aningaasaliissutit missingersuutitut ilanngussaq suliasap nassuiaataanik imaqqassavoq, tassani allassimassallutik:

a) Missingersuutit tunngavigisanut, siunertamut, aningaasaliinnermi tunngaviusunut nassuiaat, kiisalu immikkoortumut pilersaarutit imaluunniit sanaartornermut inatsisit il.il. aningaasaliissutitut pingaaruteqartut allallugit.

b) Suliassamut nassuiaatitut takussutissiaq, tassani allassimallutik aningaasartuutissat naatsorsuutigineqartut kiisalu ukiunut agguaanerit.

c) Suliassanut nassuiaatit. Suliassanut nassuiaatit nalunaarummi § 9, imm. 2 naapertorlugu aningaasaliissutit atugassiinissamut pisussaaffiliipput. Suliassanut nassuiaatini sanaartornermi suliassat aningaasaliissutit ataanni ingerlanneqarsinnaasut paasinarsinneqassapput aamma killissalernerqassallutik. Nassuiaatini pingaarnerit ilaatinneqartut nassuiarnerqassapput, soorlu assersuutigalugu m<sup>2</sup> amerlassusissaat, init amerlassusissaat, aggulinerit imaluunniit atuuffissaat il.il. naatsorsuutigineqartut. Tamatuma saniatigut suliassami suliassamut piffissamut killissaliussat nassuiarnerqarput, ilanngullugit suliassap aallartiffissaa naammassivissaalu naatsorsuutigineqartut.

## Kapitali 6

### *Illassutitut aningaasaliissutit*

§ 16. Nutaamik imaluunniit allanngortitsilluni aningaasaliissuteqarnissaq pillugu qinnuteqaat Naalakkersuisut sinnerlugit Aningaasaqarnermut Naalakkersuisup Inatsisartut Aningaasaqarnermut Akileraartarnermullu Ataatsimiititaliaanut saqqummiutissavaa.

*Imm. 2.* Aningaasanut inatsimmi, oqaasertaliussani imaluunniit inatsisit allani tunngaveqartumik atugassiinerit, Aningaasaqarnermut Akileraartarnermullu Ataatsimiititaliamit akuerineqartussat, matumani kapitali malillugu ilassutitut aningaasaliissuteqarnissamik qinnuteqaatitut ilusilerlugu ataatsimiititaliamut saqqummiunneqassapput. Illassutitut aningaasaliissuteqarnissamik qinnuteqaat, takuuk uniffik siulleq, Aningaasaqarnermut Akileraartarnermullu Ataatsimiititaliamit akuerineqartut, ilassutitut aningaasaliissutitut inatsimmi ilanngunneqassapput.

§ 17. Nutaamik imaluunniit allanngortitsilluni aningaasaliissuteqarnissaq pillugu qinnuteqaat, taamaallaat ukioq aningaasaliiffusumi aningaasartuuteqarnermik sunniuteqartillugu atugassiissuteqarnermut taamaallaat tunngassuteqassavoq. Ukiuni kinguliini sunniutaasussat aningaasanut inatsit takkuttussaq siullermi ilanngunneqassapput. Taamaattoq ukiuni tamatuma kingulianiittuni aningaasaqarnikkut sunniutaasussat, ilassutitut aningaasaliissuteqarnissamik qinnuteqaammik allassimassapput.

**§ 18.** Ilassutitut aningaasaliissutitut inatsimmiipput inatsisip oqaasertai.

*Imm. 2.* Inatsisip oqaasertaanniipput aningaasanut inatsimmi aningaasaliissutitut aamma oqaasertaliussanut allannguutit.

*Imm. 3.* Aningaasaliissutitigut allannguutini aningaasanut inatsimmi aningaasaliissutit, ilassutitut aningaasaliissutit aamma aningaasaliissutit tamarmiusut allanneqassapput.

*Imm. 4.* Ilassutitut aningaasaliissutitut inatsit inatsisip oqaasertaannut nassuiaatinik imaqarpoq. Nassuiaatit missingersuutitut ilanngussamiipput, ilassutitut aningaasaliissutitut ataasiakkaanut missingersuusiornermi tunngavigisat, kiisalu oqaasertaliussanut nassuiaatit, allassimallutik.

**§ 19.** Aningaasaqarnermut Naalakkersuisup ilassutitut aningaasaliissutit aamma oqaasertaliussat nutaat imaluunniit allannguutillit katersussavai, aamma ilassutitut aningaasaliissutitut inatsisissatut siunnersuutip suliarineqarnera ingerlatissallugu.

## **Kapitali 7**

*Atuutilerfia aamma ikaarsaarnermi aalajangersakkat*

**§ 20.** Nalunaarut manna ulloq 15. december 2020, taamaattoq takuuk imm. 2.

*Imm. 2.* Taamaattoq nalunaarummi kapitali 4 aatsaat ulloq 1. januar 2021 atuutilissavoq aamma 2022-mut aningaasanut inatsisissatut siunnersuutip suliarineqarneranut atuutissalluni.

*Imm. 3.* Nalunaarutip matuma aamma missingersuusiornermut malittarisassat 17. juni 2008-meersut imminnut naapertuutinnigippata, nalunaarut manna salliutinneqassavoq.

*Namminersorlutik Oqartussat ulloq 27. november 2020*

Vittus Qujaukitsoq

/

Nikolai S. Christensen

**Namminersorlutik Oqartussat**

Imaneq 4

3900 Nuuk

E-mail: [nsninatsit@nanoq.gl](mailto:nsninatsit@nanoq.gl)

Linkit iluaqutaasussat

Kalaallit Nunaanni inatsisinut nalunaarutit  
Namminersorlutik Oqartussat inatsisinut toqqorsiviat  
Naalakkersuisut